



Орган Лемковского Союза

Выходит в каждый четверг.

Редакция и администрация в Крыниці. — Адрес „Лемко“ Крыница.

Ище ест на складі иллюстрированный календар „Лемка“ на рок 1937. Крім того выдано также малый кышенковый календарик для дітей и великий календар стінный.

Цена одного экземпляра выносит 50 грошей

и кошты пересылки. При замовленю понад 10 календарей кошты пересылки покрыват администрация „Лемка“, котра дае также оден календар даром.

Доход с малых календариков, котрых ціна выносит 10 грошей, перешама на Руску Бурсу в Горлицах.

Редакция.

До чего стремиме.

Люды, котры занимают ся лем власным господарством, власными клопотоми и справами и не принимают участи в общественном житю, часто дивуют ся и не могут зрозуміти, по што то инши люды ходят до читальні и на собрания, по што пренумеруют они газеты, закладывают кооперативы и старают ся перевести организацию села, ци повіта.

Лем рідко зустрічат ся людей, котры на пытанє, чом предплачают газету, або чом належат до той або другой организации, отповідають, же разом можна скорше штось зробити, а каждый отдільно, хоц бы и руки по локті стер, не поправит судьбы ани собі, ани другому. А што до газеты, то платит за ню прото, бо она ест му потребна при роботі. Она — як добрый приятель — даст все добру раду, не одно выяснит и подсунет неодну добру мысль. Газета лучит людей, с ней довідуете ся, як живут и робят люды в других краях и якыма дорогами будуют лучше добро; наконец газета ест отбитем стремлень человека до лучшего жития.

Беручи под увагу такы отповіди, насуют ся нам пытанє, ку чому мы стремиме и ци наши ціли сут отбитем стремлень и бажань наших читателей.

Не даст ся заперечити, же найсуущественнейшом цілю жития людей на селі ест безперечно стремленє до осягнення лучшей доли и яснейшей формы быта. Загал селян чув и розуміє добре, же в житю на селі много річей можна и треба змінити и улучшить и ту именно сходят ся наши ціли и стремления, бо нашою цілю ест именно поднести и змінити на

лучше уровень жития на селі. Через цілый час существования газеты стремиме до того, штобы злучити роспорошены усилия селян, облегчить им житє, поднести выдальность их работы, указать найновіиши и наилучши способы ділания и представить осягненны уж гдеинде в світі результаты. Тым путем стараеме ся лучшим трудом, опертым на досвідах, впровадити в чин выпробованы в ріжных осередках теорії. Світ поступат наперед мильовыми скорнями, и хотячи не оставати с позаду за другими, мусиме напружити всі силы до лучшего труда.

Даючи в короткой формі зміст найновіиших метод домашнего труда, выхования дітей, гигиены, господарства и т. д., маме на ціли не лем познакомити с ними загал селян, а радше заинтересовати порушенными в газеті справами. Мысль, раз рушена, не перестает нуртовати, глядат отвіта на поставлены пытаня, багне выпробовати и примінити до своих у-

Процес Радка и его 15 товаришей.

Дня 23. т. м. роспочал ся новый процес в Москві против троцкистам. Серед оскарженных находит ся славный редактор Радек и 5-охиных редакторов. Акт оскаржения подае, же в р. 1933. оскаржены основали организацию, котра по инструкциям, якы давал ей Троцкий, формовала диверсийны и терорыстичны группы, котры допустили ся актов саботажа и диверсий в многих підприємствах, особенно таких, котры мали оборонне значенє. Группы тоты уряджали терорыстичны замахы на ру-

словий, зачинат будити заинтересованє и то ест именно стремленє и ціль, до котрой идеме. Раз заинтересованный якомси справом читатель, не вдоволит ся уж пару строками отвіта, але зачне дополняти свои відомости читанем отвітно подобранных книжок и тым способом поглубяти свои знаня.

Политычных справ не рушаме, а по крайной мірі, стараеме ся их не рушати. Наши читатели знают добре сами, чим они сут и в том напрямі мы спокойны, же их никто не збаламутит. Гдеякы вісти с политычного жития в краю и світі подаеме лем прото, штобы каждый знал, што творит ся на широком світі и выробити собі сам о том суд. Наибольше однак увагы посвячаеме проявам жития господарчого, бо знаме, же политика добра для сытых, а голодный мыслит передовсем о хлібі. Тот насушный хліб хотіли бы мы дати нашоу селу и о лучшу господарчу будучность лучиме всі наши усилия, котры тым скорше принесут добры результаты, чим больше число людей зрозуміє наши ціли и прийме активну участь в загалной работі.

ководителей советской коммунистичной партии и советского правительства. Тоты самы группы, на основі поручения от Троцкого, занимали ся также шпионажем на користь других держав. Ціла діяльність тых групп, пише прокуратор, мала на ціли ослабити милитарну силу Советов, спричинити напад на Советы, помочи розділові Советов, обалити советскы власти и впровадити до России наново капиталистичный порядок.

Всіх оскарженных ест 16-ох. Крім Радка сут оскаржены: Пятаков, Сокольников, Серебряков и инши. Всіх же кара смерти.

Бой в Испании не устают.

В Испании уж от перешло двух місяців идут завзяты бои о опановане Мадрыта. Бон тоты приносят обом воюющим сторонам великы страты, не даючи жадной с них рішаючих успіхов. В послідном часі бои шли о университетске місточко в Мадрыті. Правительственны войска переходили пару раз до атаки, але повстанцы отперали всі их атаки, переходячи до контратаков. Горны роботники, воюючи в рядах правительственных войск, подложили в университетском місточку пару мин. Обчисляют, же правительственны войска стратили в тых боях около 1.000 вояков убитыма. Повстанчи войска бомбардовали Малагу трох-

моторныма самолетами, але не нанесли поважной шкоды. Республиканскы войска принимают всі міры, штобы обезпечити Малагу от бомбардованя. Для той ціли выслано под Малагу 3 подводны лодкы, 22 самолеты и 5 батальонов войска.

В повстанчих войсках служат также мурины, сформованы на острові Фернандо По. В загалі, як подає агентство Рейтера, в Испании бют ся меже собом ріжны народы. По стороні правительственных войск находит ся 40.000 войск чужих, а по стороні повстанцов ест их 32.000, в том числі 20.000 италян и 12.000 німцов.

Грозный конфликт вызванный через Німеччину.

Ціле населене французске ест сильно занепокоєне надходячими вістями с испанского Марокка (Полночна Африка), где Німеччина почала громадити свои войска. Як відомо, в Марокку рядят тепер повстанцы. Они сорганизовали там на початку домашной войны в Испании свои войска и соттамаль выступили до боя против правительству.

Испанске Марокко лежит в сусідстві французского Марокка. Тепер пришли вісти, же Німеччина концентрує там свои войска. Французске правительство-выслало острый протест против обсаджаню испанского Марокка через німецкы войска, на што достало отвіт с Німеччины, заперечающий тым поголоскам. Але Франция не барз вірит Німеччині и громадит при берегах испанского Марокка свою военну

флоту в количестві невиданом от часу світовои войны. Видно с того, же Франция придає теперешному положеню в исп. Марокку велику вагу и нич дивного, бо если бы Німеччина укріпила ся на полночно-западном побережі Африкы, было бы тото катастрофом для Франции.

Але Франция находит ся в том счастливом положеню, же и Англия не може допустити до того, жебы Німеччина осіла над берегами Середземного моря, бо втотчас угрожала бы ей интересам на Середземном Морі и в каналі Суэзском. Тому мусит она поперти Францию против Німеччины, о чом знає добре Франция и чуючи ся сильном, може отвітити на німецкы удары контрударами.

Испанска война на Лемковщині.

Якыйси панок, котрый подписал ся „Дукельский” помістил в Ч. 3. с 17. січня 1937 р. „Господаржа Польского” допись под заглавием „Война испанска на Лемковщині”, в котрой пише, же в селах лемковскых короснянского повіта ширит ся в застрашающий способ

коммунизм и же там велике заинтересоване будит война испанска. П дописи подає, же на святочном принятю у Вильгельма Лондки в Дуклі, у Якуба и Михала Кровицкых в Теодоровці и у Владыслава Качмарского в Теодоровці многолітствовано по поводу мнимых побід коммунистичной армии. Дальше, же вісти о ході войны достают от охотников, походя-

чих с того повіта, жиющих во Франции и звербованных до обороны Мадрыта.

На принятю у Вл. Качмарского — пише автор дописи — было около 80 большевиков и радили над высланием делегата на якийси меженародный конгрес и выбрали делегатом Вл. Качмарского. У Якуба Кровицкого была перед святыми ревизия и сконфисковано у него безбожничы летучкы и т. д.

Не входячи в тото, килько ест правды в дописи, дивує нас лем одно, при чом ту Лемковщина. Правда, Дукля и Теодоровка лежат в лемковской части повіта короснянского, але имена: Вильгельм, Якуб, Владыслав, а также назвиска: Лондка, Кровицкий, Качмарский — сут чисто польскы и напевно под нима крыют ся полякы. Тож ціль той дописи ест тенденційна и автор дописи має охоту представити наше населене, яко грозне и опасне для теперешного державного порядка. Крім того с дописи той видно, же дописователь має сгдеякыма нашима людьми и личны порухункы, бо пише дальше так: „коммунисты в лемковском селі Мысцові за Дукльом, помочники войта Сысака, одержали от товариша Янковича лист с Испании с вістями, же разом с ним выхало до Испании с Франции пару охотников с Мысцовы, Полян и сусідных сел на помоч коммунистам испанским”. Спритно и ловко хоче ся зроби́ти с войта Сысака опасного коммуниста, бо „его помочники - большевики достали лист с Испании”. Правда ему самому не зашмарят ся нич, але охота зроби́ти с него симпатика большевицкого пробиват ся аж за ярко.

С цілою той дописи видно ясно ище одно, же дописователем ест якийси самозванчий опекун Лемковщины, котрому здає ся, же лемкы повинны и мусят так скакати, як он им загра́т, а же не всі танцуют под его нуту, то треба осторожно их доносить и клеветати на них. Але тото ся не удаст, бо як коваль ся провинил, то трудно валити провину на столяра. Если якыси Якубы, Вильгельмы и Владыславы сут коммунистами, то не можна с них втотчас робити лемков.

ПРАВДИВА ИСТОРИЯ.

Было то в одном селі на Лемковщині. Паро́хом села был украинец, больше политик, як священник, котрый нерідко проповідальнику в церкви уживал за вічеву трибуну. Хотячи проявити свою украинску ревность и не находячи отвітного грунту серед руского населения села, основал он украинский кооператив, до котрого принял за склепара одну дівчину, дочку тамтешного господара. Молода и неопытна дівчина вела sklep при помочи панича с клевани, котрый рядил ся в sklepі самовольно и допровадил скоро до того, же при переведеной ревизии в sklepі найдено товарового манка на суму понад 700 злотых.

Отец дівчины, отдаючи ю до skleпу, выставил кавцийны вексли и тепер мусіл покрити недобор. Через тото попал он в материяльны клопоты и в хаті начала ся грызня. Отец часом покричал, мати помогла, а дівча плаче и плаче, бо не іло, ани пило, а таке несчастье на не ся звало. Хо́ц молода и слаба ище, не выдержала в хаті и наняла ся на службу в сусідном селі. Натрафила на добрых людей и хо́ц пару раз міняла службу, жило ся ей все дост добре, а же была и трудолюбива и ошадна, то покус и родичам сплачала выплачены за ню в sklepі гроши. Свои послідны літа службы пережила она у одного сознательного газды, котрый и сам любит іздити на ріж-

ны собрания и ю часто с собом забрал. Понятливе и интеллигентне с натуры дівчатко любило в неділі и свята читати книжки, любило вывчити ся ролі при даваных представлениях в читальні ім. М. Качковского и познало в коротком часі, же тота читальня ест осередком науки и просвіти и же тепер жадне село не може розвивати ся и поступати вперед без того очага культуры.

По якомси часі пришла и ей неділя, и она вышла за муж за молодого и идейного хлопца, котрый также был членом читальні и принимал живу участь в просвітительном житю села. Молодыта замешкали в сусідном селі и жило ся им на загал добре. Одно лем не давало им спокою, а именно тото, же в их селі не было ище читальні ім. М. Качковского. Поволи однак почали они обоє организовати місцеву молодеж и доби́ли ся того, же молодеж сама, без якоїнебудь посторонной помочи, а наоборот, против волі всіх старших, основала в себе читальню ім. М. Качковского, со складок закупила книжки и газеты и в вынанятом домі почала сходити ся вечерами, штобы с газет и книжок довідати ся, як живут другы народы и што діє ся на широком світі.

Закотловало тепер серед стариков.

— Та слушайте ле кумо, што ся тепер у

нас водит? — гварит стара Марта до кумы Варвары.

— Тат знате, проклятьство світа, а то вшитко лем про тоту..., най не выречу — зайду с поза ліса. Гварилам все, не тра ей было пущати до села, бесідує кума Варвара.

— Так, так! Пуст куру под стол, она и на стол выскочит, приняли мы ю до села, а тепер што вырабат? Хлопчиска, або дівчатиско труд в хижі утримати, лем до якоїси читальні и читальні...

— Скаране Боске с том читальньом, втручат ся до бесіды кум Максим. Тилькы роки жию, уж недалеко мі до осемдесяткы, а тако-го-м чуда не чул, жебы ту в нас ктоси закладал якуси читальню. Давно, памятам, як-ем был ище молодой, то порядный газда, або и паробок, як хтіл видіти ся с кумом, або сусідом и пошановати ся с людьми, то ишол до корчмы до Мендля и там ся забавил. Ба, та и рада громадска часто там ся збирала, бо то знате, Мендель, добрый жидиско был, и поради́л добре, а и пол кварты палюнкы поставил для войта и радных и вшитко было в порядку. Молодеж старших шановала, войт мал повагу в селі и добре было. А днеска што? Якаси читальня, газеты, книжки, представления, та ба, — ище захтіват ся им читальняного дому. Повідам вам кумо, зле с того буде и я сеюму Анткови не позволю там ити.

Але Антко и другы молоды в селі, хо́ц по-

Не выстарчит кормити, але треба давати отвітну пашу.

Каждо рости́на має свої вимоги так што до ґрунту, як и кормових складників. Пшени́ца вимагат тяжкого ґрунту, жито виросте и на легком, ячмень не потребує дуже азоту, а бураки вимагають его дуже. А найцікавіше того, же недостаток одного кормового складника не можна заступити надміром другого, то значить, же не можна надіяти ся доброго уроджая нпр. бураков, если в ґрунті єст за мало азоту, хочбы фосфору в ґрунті было барз дуже. Если хочеме мати добрый урожай, то мусиме заспокоити всі вимоги рослины. Сут то річи знаны загально всім селянам.

Так само єст и при кормленю живого инвентара. Звірята держиме для користи, яку нам они дають. Коня уживаме, яко робочой силы, корова має давати дуже молока, кура — дуже яйц, свині мають переробити пашу на мясо и омасту. Але сила коня, аджек и выдайность его работы зависит от розроста его мускулов, количество молока або яйц — от пашы, яку даєме корові и курам. Не можна жадати, штобы выдайность звіряти была велика, если оно єст кормлене нужденно, статок мусит быти кормлений добре.

Але не выстарчит его лем кормити. Треба также здати собі справу с того, же давана паша мусит быти отвітна, бо лем втотчас будут добры результаты. Што значить однак, же паша повинна быти отвітна?

Штобы дати отвіт на тото пытанє, треба звернути увагу на тото, же яйца, молоко, мясо и други продукты, які дають нам звірята, мають в собі ріжны складники, як білко, вапно, фосфор, угель и т. д. Складники тоты находит ся в ріжных пропорциях, одных єст меньше, других больше. В яйці єст дуже білка и вапна (в шкарлупі), в молоку — білка и толщу, в мясі — білка и т. д. Найважнішим складником єст білко. Прото тыж білко повинно находит ся в паші, яку даєме звірятам. Если білка не буде, то хоч бы давало ся

не знати як дуже иншой пашы, выдайность ей буде мала, то значить, же конь буде слабый, корова даст мало молока, кура знесе мало яйц, а свиня ся не опасе.

Треба признати, же при хові свиней, особливо переназначеных на опас, селяне здають собі справу, же самыма картофлями опасты свині не можна. Если иде однак о рогатый статок, то справа представят ся совсем зле. Кус картофляных луп, кус соломы — то все. Дбалый газда кромі бандуркы дає ище кус отруб, але звичайно за мало и прото результат єст слабый, то значить, же корова не дає тилько молока, килько могла бы давати, если бы доставала корм обыльный в білко.

Треба однак знати, же в бандурках єст барз мало білка, а отрубы містят их в собі, але не тилько, килько его треба. Корова не буде голодна, але молока дуже не даст.

В тых условиях додаток пашы містячої в собі білко, т. зв. пашы сытной, єст конечно потрібный. Не можна сытной пашы заступити другом пашом, нпр. бандурками, бо треба бы их дати тилько, же корова не могла бы того с'істи. Было бы тото марнованем бандуркы, бо организм звіряти не мог бы використати других складников, находячих ся в бандурках.

Білко находит ся в таких пашах, як макухы, а понеже макух льняный и ріпаковый походит с краєвых ростин, селянин, уживаючи тых паш неякобы сам себе поперат. Дуже білка містят ся также в добром сіні, в коничі, люцерні, сераделі и т. д. Если ходит о куры, треба памятати и о ванні, потрібном до вытвореня шкарлупы. Аж, коли паша буде містити всі складники, можеме ся надіяти добрых результатов и втотчас селянинови оплатит ся напевно ховати живину.

Мохначка Нижна

пов. Новый Санч.

На третий день Свят Р. Хр. в нашої читальні отбыло ся Обще Собрание членов при участии делегата Центр. О-ва им. М. Качковского ревизора Осипа Яновицкого и мгр. Емили Яновицкой.

По выборі президиі Собрания, до котрой выбрано председателем г. О. Яновицкого, а секретарем г. Ивана Поручника, отчитано протокол с попередного Собрания, два доклады с ревизий, переведенных в читальні с рамени О-ва, уступающий. Выділ доложил справозданє со своей деятельности. Касовый оборот чит. за минувший рок представляют ся слідуячо: на приходах было зл. 234.73, на расходах зл. 112.66, готовы гроши на день Собрания выносили зл. 122.07. Притом было зазначено, що многы члены не заплатили своей членской вкладки и поднесено, што до будучого выділа повинно ся выбрать людей энергичных, котры бы заняли ся стягненем той належитости. Обговорено справу будовы чит. дому и средств потребных на тото, покликано ся на инши села, далеко біднійши, в котрых уж повстали свои народны дома и выражено надежду, што нововыбранный выділ посвятит той справі дуже увагы и доведе до конца добры пляны попередных выділов. По отчитаню справоздания комиссии контрольной, Собрание ухвалило уступающему Выділові абсолюторию.

До нового выділа были выбраны: председателем — Иван Поручник, місто-председателем — Константин Пласконь, секретаром — Андрей Цидило, касиром — Николай Гавран, библиотекарем — Николай Жерелик, а заступниками: Теодор Вардзаль и Петро Гарбера. До комиссии контрольной выбрано: Петра Зяю, Ивана Гарберу и Филимона Шоста.

Делегат О-ва выголосил до присутных слово, які користи приносят чит. селянству при

Десят и пол миллиона несчастных wypadков.

Як в каждой иншой области, так и в области несчастных wypadков держит Америка фантастичный рекорд.

Як подає статистыка мало місце в Злученых Державах Америкы Полночной от 1. жолтня 1935 р. до 1. жолтня 1936 р. — 9,500.000 несчастных случаев, с котрых 110.000 было смертных. Случаев самоходных было 1,250.000, с чого 36.300 смертных.

Втраты споводованы несчастными случаями оціняють на суму 800 миллионов долларов.

отпосвідном веденю читальняной работы, причом взывал выділ чит. тримати ся строго статута читальні, проводить в житє девизы читальні, а результаты с того будут дуже добры.

Мгр. Емилия Яновицка в дольшой бесіді до селянства указала на ціль чит., яко народно-го университета, где каждый може много научити ся, а именно научити ся любить свой народ, віру и стати добрым гражданином своего народа и державы. Указала притом також, што чит. научит селянство доброго веденя господарства в ріжных его галузях, як напр. заводити сады, пчеловодства, зберания лічебных зел и т. п., а с того прийде и материяльна користь. Притом зазначила, што если бы в селі организовал ся кружок молодежи, котрый хотіл бы зберати лічебны зела в наших горах, то дуже радо буде служить своим фаховыма указаниями и продаст рынки збыта тых зел, за котры аптеки и фирмы добре платят. Наконец заохотила до діятельной работы на чит. ниві.

По законченю собрания аматорский кружок под руководством гна Петра Зяи, на сцені чит. театра, в місцевої народной школі, отограл представлєне под заглавием: „Заклятый яр“, с котрого всі аматоры вывязали ся дуже добре, доказуючи талант и интеллигентну гру на сцені. Одно лем різало ухо слушателя, — то текст и слова не народного говора, а той: „выдуманой, никому не потребной укр. мовы“, бо песа была выдана украинофильского. Для того на другой раз руководитель кружка повинен всякы слова, як напр. „матимуть, бутимуть и т. п.“ безусловно вышмарити и замінити прекрасными лемковскими словами народными, як взагалі всі тоты штучны укр. пєсы выкыдати на смітник, а по крайной мірі всі штучны слова, так званой „укр. мовы“, котрой никто с присутных не розуміє, замінити народными натуральными словами на своем лемковском нарічю. На другой раз г. Зяя и аматоры певно того блуду не пополняют.

Честь Вам и слава Мохначчане за Вашу працу на поли культурно-просвітительном, працюйте и дальше так, а увидите, што користь с того буде велика.

Треба зазначити, што на собранию и представлєню было также населєне сусідной Мохначкы Выжной, котре интересує ся чит. роботом и може в 1937 році оживит діяльність в своей читальні.

В добрый час Мохначчане с Выжной Мохначкы, берте примір с Ваших братов и працюйте для своего села и молодежи.

Доброжелатель.

за тым были послушны, не робили собі нич с наріканя старых и свое робят. Взяли ся остро до работы. Кромі читаня нараджають ся они, як бы прити до власного дому. И складкы зберают и прирекають помочи в роботі при будові. До корчмы не ходят и там ся не шануют, але за то уряджають собі часом забаву в читальні, на котрой мило проводят час. И дивно одно. В том селі дост часто, покля люды шановали ся в корчмі, трафяло ся, же на весілях и забавах шановали ся количками, а тепер тото совсем устало. Видно, же читальня не єст так шкодлива, як то выдає ся кумови Максимови, а же молодеж горне ся до науки и просвіты, то ей лем честь и слава за тото. Не уставайте дальше в своих наміренях и кончте счастливо начате добре діло.

Наконец старикам повіме одно. Часы ся міняють и світ поступат. Зміны идут поволи, але все и через вікы робят они громадны успіхы. Наши давны предкы носили одежу шниту с двох або больше скор и жили в скальных печерах, наши діды, а часом аж и отцы мешкали в курных хатах и їли адзимку, а мы маме уж красны хаты с коминами и їме мясо и білий хліб. Так и с читальнью. Давнійше была мода на корчмы, а тепер их місце выпєрають читальні и повірте мі, же то дуже ліпша мода. Біды она не принесє никому, а користь єст певна, бо як ся кто дачого научит, то того не забере ему ани вода, ани не спалит огонь.

Що чути в світі.

Рим: Дня 20. І. роснула ся вість о смерті Папи Римського. Вість тота оказалась ся на счасі неправдива. Але ватиканскы круги не таят, же стан здоров'я Папи Римського єст барз гресный. В ногах чує Папа Римський невіротно болі, причом замічат ся слабу опухоль ног. Лікары не отступають Ёго и не тратят надежды, бо сердце помимо старости єст силне.

Парыж: Французский министр для колонии Мариус Муте приготуват плян широкой колонизации для жидов, для котрых мають отступити обширны и плодородны землі во французских колониях, в першой мірі, на Мадагаскарі. Француске правительство має дати колонистам всевозможны льготы, а саму справу перенесеня и заосмотреня колонистов во всео потребне для колонизации мають приняти на себе жидовскы организации, котры будут мусіти собрати на тоту ціль потребны капиталы.

Москва: Агенция Тасс доносить, же верховный суд на выездовой сессии в Мелекесс (округ Куйбышев) засудил за убийство Прониной Росова, Фиедотова и Бщеркина на кару смерти, а за участь в злочині Карпова и Антонину Гулиаеву на 10 літ вязниці, а Михаила Гулиаева на 6 літ.

Прага: С Берлина доносят, же в Берхтесгаден будує ся скоро величезный будынок на приватне помешканє для Гитлера и канцелярий. Будова тота має быти звязана с погоршачим ся станом здоров'я Гитлера. Боли горла повтаряють ся чимраз частійше и заходит опасность поважных осложнений, стан здоров'я Гитлера єст держаний в тайні. В Берліні кружат знова поголоскы, же 30. січня Гитлер откаже ся от достоинства канцлера, а задержит їм тытул президента Німеччины.

Відень: С поинформованных кругов доносят, же в гдеяких австрийских союзных краях отбыли ся собрания членов розвязаной организации „Геймверы“ под предлогом собрань ликвидацийных. На собраниях тых промовляно остро против правительству, домагаючи ся сорганизования на ново „Геймверы“. В политычных кругах высказуют обаву, же ебентуальне выкористанє того руху через народно-социалистычну пропаганду може стати ся опасне для правительства.

Атены: Грецкий министр финансов донос о законченю переговоров с Німеччином в справі позичкы, яку має дати Німеччина Греции в высоті 6.150 миллионов драхм. Німеччина має дати позичку безотложно. Позичка має быти обернена на дополненє вооруженія Греции. Позичка єст уділена на 3 процент и має быти сплачена в шестох роках. Позичка єст загварантована доставом грецкого дугану для Німеччины.

Відень: С Инсбрука доносят, же авто, в котром іхала голяндека королева Вильгельмина на прогулку, поскользнуло ся с дороги над берег пропасти и же одно колесо висіло уж над пропастью. Шофер-полициянт, котрый провадил авто, потрафил цофнути воз на дорогу. Королевой и трем ей товаришам нич ся не стало. Королева має приїхати до Крыницы, где жие ей дочка, королевна Юлианна со своим мужем, князем Бернардом фон Липпе-Бистерфельд.

Берлин: Фабрика оружия Круппа по раз перший по світової війні виплатила своим

акционарам дивиденду. Єст то знак, же в Німеччині военный промысел приносит знова великы доходы. Фабрика тота не подає однак, килько має затрудненых работников, але обчисляют, же всіх работников єст там около 100 тысяч.

Нью-Йорк: Якы величезны гроши мають люди в Америкі, свідчит о том слідуюча статыстка податков. Властитель великих американских газет находит ся меже тума богачами на першом місці; его рочный доход обчислено на суму пол миллиона долларов. Слідуючи місца занимают фильмовы артысты с рочныма доходами от 260.000 до 480.000 долларов и аж пак идут властители великих фабрик.

Нью-Йорк: В Америкі была величезна злива. Ріка Огио и ей доплывы выступили с берегов в 8-ох державах и заляли пространство понад 1.200 км. Жертвом наводнения упало до тепер 600 людей, котры ся утопили. Понад 4.000 людей находит ся без даху над головою. Шкоды выносят пару миллионов долларов. В Пенсильвании злива уж устала, але в других державах дожджи ліют дальше. В Питсбургу вода выступила перешло один метер над нормальный уровень.

Москва: Дня 6. т. м. отбыло ся в Москві „свято грузинского народа“.

На представленю в театрі был присутный Сталин, Ворошилов, Димитров, Каганович, Молотов и други советскы достойники. Все надіяли ся, же Сталин по бурливых овациях выголосит коротку бесіду. Тымчасом Сталин не сказал нич до своих земляков (Сталин сам єст грузином). Тот факт уважают за ище одно потверженє поголосок о его хвороті горла. Бесідуют, же Сталин має рака горла. С той то причины Сталин уж от давна не бесідує на публичных собраниях. Не сказал бесіды ани на собраню быших офицеров в Москві.

За то преса и московске радио розвинули велику пропаганду, заохочаючи населенє до купна грамофонных плит с награныма бесідами Сталина, котры он выголосил давнійше. Тоту пропаганду и факт, же Сталин тепер не бесідує николи публично, уважают в Москві за доказ, же поголоскы о раку горла сут правдивы.

Нью-Йорк: Штобы противодійствовати ширеню ся малярии в Америкі, приступлено до нищення комаров. До того уживат ся аеропланов. В часі, коли вылягають ся комары, цілы ескадры войсковых самолетов розсївають над

мочарами спорошкованный сірчан міді. Таким способом вылягаючи ся комары натрафяют на цілы поля убийственной для них труткы и гынут.

Женева: В славном приюті св. Бернарда в Швайцарии здох недавно от старости заслуженый пес, котрый через 17 літ своего жита выратовал жите 23-ом людям, котры заблудили в часі курявки в швайцарских горах. Уратованы через пса интересовали ся все судьбом своего спасителя. Прото тыж, на вість о его смерти, звернули ся с просьбом до монахсе, штобы монахы дали на их коншт пса вынхати и заховати, яко рідкый оказ.

— Если бы человек спас жите 23-ом людям, выставлено бы ему напевно памятник — нише оден с выратованных — переходайме аджек и мы останкы благородного звіряти, котре спасло нам жите.

Вісти с краю.

Варшава: Газеты румунскы доносят, же приїзд министра Бека до Румунии наступит при конци лютого т. р.

Варшава: Министр заграничных справ О. Бек выїхал дня 19. т. м. до Женеви в ціли принята участи в сессии Рады Лиги Народов. Министрови товаришат: дыректор кабинета министра Михаил Лубенский и личный секретар Станислав Седлецкий.

Глубоке: (ПАТ.). Дня 16. т. м. на территории С. С. С. Р. отбыла ся конференция гранична. В конференции приняли участь с польской стороны повітовый староста Дзисненский в товаристві урядников и офицеров, а со стороны С. С. С. Р. представитель до справ граничных на район Вертынський. На конференции обговорено справу меліорации приграничных грунтов и справы непорозумлень граничных.

Мушина: Полиция осадил в аресті в Мушині двох ноторычных преступников Владыслава Соротовича и Романа Муху, подозрілых о вламане до склепов в Мушині.

Боячи ся кары Соротович, котрый был уж каранный, постановил утечи. Звірил ся с тым перед Мухом и третьим узником Гльонком и разом почали перебивати дыру до пивниці. Не утекли однак, бо их роботу спостережено на час и перевезено их до арестов в Новом Санчі.

КТО ХОЧЕ ЗАБЕЗПЕЧИТИ СЕБЕ НА СТАРОСТЬ И РОДИНУ
ОТ НУЖДЫ И ГОЛОДА, АБО ЗЛОЖИТИ ДІТЯМ ВІНО,

НЕХАЙ ЯКНАЙСКОРШЕ

за асекурує ся
в асекураційном Товаристві
ВИТА И КРАКОВСКЕ
во **ЛЬВОВІ**

Асекурацію принимают на цілої Лемковщині
представителі: гг. Осиф Ямовицкий — Крыница - Село
и Михаил Перелом — Сянок.